

## I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

### LURRALDE OREKAREN ETA LURRALDE ANTOLAMENDUAREN SAILA

**Foru Gobemu Kontseiluaren 336/2024 Erabakia, ekainaren 4koa. Onespena ematea Arabako Lurralde Historikoko toki erakundeentzako obra txikiak gauzatzeko 2025eko programaren barruko laguntza lerroaren deialdiari**

Ekainaren 27ko 21/2013 Foru Arauak auzo harremanak sustatzeko ekimenetarako eta Arabako toki erakundeetan obra txikiak gauzatzeko laguntza programak arautzen ditu.

Foru Arau horren III. tituluaren obra txikiak gauzatzeko programari buruzko xedapenak ezarri, eta halako laguntzak emateko arauak eta irizpideak finkatzen dira.

Programa hori Arabako Foru Aldundiak Arabako Lurralde Historikoko tokiko erakundeekin duen finantza lankidetzarako aparteko tresna da, erakunde horietan egin beharreko 35.000,00 eurotik beherako inbertsioak finantzatzeko laguntzak emateko.

Horretarako, eta Arabako Lurralde Historikoko Dirulaguntzei buruzko urriaren 19ko 11/2016 Foru Araua aplikatuz, obra txikiak gauzatzeko 2025eko programaren barruan Arabako toki erakundeentzako laguntzak arautuko dituen deialdia onetsi behar da.

Deialdia idazteko, kontuan hartu da Emakumeen eta Gizonen Berdintasun Eragingarrirako martxoaren 22ko 3/2007 Lege Organikoak eta EAeko Emakumeen eta Gizonen Berdintasunerako Legearen testu bategina onesten duen martxoaren 16ko 1/2023 Legegintzako Dekretuak ezarritako arau esparrua.

Horrez gain, Arabako Lurralde Historikoko Dirulaguntzen 11/2016 Foru Arauaren 7.3 artikuluan ezarritakoaren arabera, kontuan hartu da euskararen erabileraren faktorea Arabako Foru Aldundiak onetsitako hizkuntza normalizazioko politikaren esparruan, eta Euskararen Erabilera Normalizatzeko azaroaren 24ko 10/1982 Oinarrizko Legearen arabera.

Horregatik, Lurralde Oreakaren eta Lurralde Antolamenduaren Saileko foru diputatuaren proposamenez, eta Foru Gobernu Kontseiluak gaur egindako bilkuran gaia aztertu ondoren, honako hau

#### ERABAKITZEN DUT

Lehenengoa. Onspena ematea Arabako Lurralde Historikoko toki erakundeei, obra txikiak gauzatzeko 2025eko programaren barruan, laguntzak emateko deialdiari.

Bigarrena. Arabako Foru Aldundiaren aurrekontuko 2025eko ekitaldirako indarrean egongo den "10203. G/459100/76800100 Obra txikiak gauzatea" izeneko aurrekontu partidari 1.961.995,00 euro esleitzea, deialdi honen ondoriozko ordainketei aurre egiteko kreditu egokia eta nahikoa egotearen baldintza etengarriekin.

Hirugarrena. Onspena ematea Arabako Lurralde Historikoko toki erakundeei, obra txikiak gauzatzeko 2025eko programaren barruan, laguntzak emateko deialdia arautzeari.

#### 1. Arauketa.

Programa ekainaren 27ko 21/2013 Foru Arauaren III. tituluaren ezarritakoaren arabera arautzen da (Auzo harremanak sustatzeko ekimenetarako eta Arabako toki erakundeetan obra txikiak gauzatzeko laguntza programak arautzen ditu arau horrek; aurrerantzean, 21/2013 Foru Araua).

## 2. Erakunde onuradunak.

Arabako Lurralde Historikoko kuadrillek, kontzejuek eta udalek (Vitoria-Gasteizkoak izan ezik) jaso ditzakete obra txikiak gauzatzeko programako laguntzak.

Ezin izango dira erakunde onuradun izan Dirulaguntzei buruzko azaroaren 17ko 38/2003 Lege Orokorraren IV. tituluan aipatzen diren arau hausteengatik zehapena jaso dutenak, ez eta Emakumeen eta Gizonen Berdintasun Eragingarrirako martxoaren 22ko 3/2007 Lege Organikoan edo Emakumeen eta gizonen berdintasunerako eta emakumeen aurkako indarkeria matxistarik gabe bizitzeko Legearen testu bategina onartzen duen martxoaren 16ko 1/2023 Legegintzako Dekretuan jasotako kasuetan daudenak ere.

## 3. Diru hornidura.

Hasierako finantza hornidura Arabako Foru Aldundiaren 2025eko aurrekontuko partiden hasierako esleipenen batura da; hain zuzen ere, berariaz edo modu osagarrian obra txikiak gauzatzea finantzatzera bideratutakoenen batura. Zenbateko horiek hasierako horniduraren ehuneko 50eraino handitu ahal izango dira.

Dirulaguntzak emateko, ezinbestekoa izango da partidan kreditu erabilgarria egotea.

## 4. Eskaerak aurkezteko epea, lekua eta modua.

Eskaerak aurkezteko epea deialdia ALHAOn argitaratu eta hurrengo egunean hasi eta 2024ko uztailaren 15eko 23:59an amaituko da.

Eskaerak aurkezteko epea bukatu baino lehen, toki erakunde bakoitzak erabakia hartu beharko du, bere antolaketa eta funtzionamendu araubidearen arabera, eskatzen dituen obra eta zerbitzuei buruz.

Eskaerak Arabako Foru Aldundiaren egoitza elektronikokoan aurkeztu behar dira nahitaez: <https://e-s.araba.eus>. Nahitaez erabili beharko da inprimaki elektronikoa espezifikoa obra txikiak gauzatzeko 2025eko laguntzak eskatzeko, eta eskaera helbide elektronikoko honen bidez egin beharko da:

<https://egoitza.araba.eus/eu/-/solicitar-ayudas-obras-menores>.

Administrazio Publikoaren Administrazio Prozedura Erkidearen 39/2015 Legearen 14.2 artikulua betez, honako hauek telematikoki aurkeztera behartuta daude, egoitza elektronikokoan berariazko izapidearen bidez: pertsona juridikoak; nortasun juridikorik gabeko erakundeak; elkargoko kide izatea nahitaezkoa duen jarduera profesional batean dihardutenak, jarduera horretan egiten dituzten izapideetarako, eta administrazioarekiko harremana elektronikoki izatera behartuta dagoen interesdun bat ordezkatzeko dutenak.

Erregistro elektronikoko bakar batean aurkeztu daitekeen gehieneko luzera gainditzen duen dokumentazio osagarria aurkeztu behar bada, beste aurkezpen bat egin ahal izango da. Aurkezpen horretan, gutxienez, zer erregistro zenbaki edo kode individualizaturen osagarria den aipatu beharko da, edo hura identifikatzeko informazio nahikoa.

## 5. Aurkeztu beharreko dokumentazioa.

Eskaerari honako dokumentazio hau erantsi behar zaio:

a) Egingo diren obren aurrekontua, nahikoa xehakaturik eta BEZa bereiz adierazita.

Jarduketa zoladura jartzeko baldin bada edo jarduketaren barruan zoladura jartzea sartzen bada, aurkeztutako aurrekontua behar bezain zehatza izan beharko da, zenbat metro koadro zolatuko diren eta zer material erabiliko den jakiteko.

21/2013 Foru Arauaren 18. artikuluko 1 b) apartatuak aipatzen dituen moduluak honako hauek izango dira 2025eko deialdirako:

- Aglomeratu asfaltikoa: 43,76 euro/m<sup>2</sup>.
- Hormigoia edo bestelakoak: 55,84 euro/m<sup>2</sup>.

b) "Hirigintza proiektuaren premiaren ziurtagiria/hirigintza txostena" inprimakia, behar bezala beteta eta hirigintza arloko udal teknikari aholkulariak sinatuta.

Inprimakian adierazten bada proiektu teknikoa behar dela, obren aurrekontuaren edo balorazioaren orde, obrak gauzatzeko proiektu teknikoa aurkeztu beharko da, eta Eraikuntzaren Kode Teknikoa onesten duen martxoaren 17ko 314/2006 Errege Dekretuaren bidez onetsitako Eraikuntzaren Kode Teknikoaren 1. eranskinean ezarritako dokumentuak eta edukiak jaso beharko ditu. Proiektuak eskatutako obrari dagokion jarduketa soilik jaso beharko du. Proiektua ez da aurkeztutzat joko, baldin eta diruz laguntzeko aurkeztutako jarduketa beste jarduketa handiago baten zati bat bada eta proiektua jarduketa handiago horri buruzkoa bada.

Inprimakian adierazten bada eragin sektorialak izango direla, eskaerarekin batera, eskatutako obra baimentzeko, baimena emateko edo aldeko txostena emateko erakunde eskudunari toki erakundeak egindako eskaeraren kopia erantsi beharko da.

Inprimakian adierazten bada esku hartzea egin nahi den ondasuna babes bereziko edo ertaineko monumentu edo monumentu multzo bat dela, eskaerarekin batera, Arabako Foru Aldundiko Historia eta Arkitektura Ondarearen Zerbitzuari aurkeztutako txosten eskaeraren kopia ere aurkeztu beharko da. Inprimakian adierazten bada esku hartzea egin nahi den ondasunak oinarritzko babes duela, nahikoa izango da hirigintza arloko udal teknikari aholkulariaren txosten eskaeraren kopia, edo, haren orde, udalaren obra lizentzia eskaeraren kopia.

Inprimakian ustezko zona arkeologikoan esku hartu nahi dela adierazten bada, eskaerarekin batera, Arabako Foru Aldundiko Museo eta Arkeologia Zerbitzuari aurkeztutako txosten eskaeraren kopia aurkeztu beharko da.

c) Eskatutako jarduketa "Hornidura edota saneamendu sareetan antzemandako gabezien ondoriozko konponketa partziala" epigrafearen barruan sartzen bada, eskaerarekin batera honako hauek ere aurkeztu beharko dira:

– Antzemandako gabeziei buruzko dokumentazioa (konponketen fakturak...).

– Haren orde, txosten teknikoa aurkeztu ahalko da, non azaldu beharko baitira antzemandako akatsak, haien izaera, garrantzia, antzinasuna eta eskaera aztertzeko interesgarri izan daitekeen beste edozer.

d) Eskatutako jarduketa bideetan obrak egiteko bada, eskaerarekin batera dokumentazio grafikoa aurkeztu beharko da, eta ahalik eta xehetasun handienaz adierazi beharko da zein tartetan jardutea eskatu nahi den.

Aurkeztutako eskaerak osatu gabe badaude edo oinarri hauetan eskatutako dokumenturen bat aurkezten ez bada, interesdunari eskatuko zaio akatsa zuzen dezala edo aurkeztu ez dituen nahitaezko agiriak aurkez ditzala hartarako ezarritako epean, eta jakinaraziko zaio hala egiten ez badu eskaeran atzera egin duela ulertuko dela, organo eskudunak ebazpena eman ondoren.

Aurreko oinarrian jasotako ondorioetarako, osatu gabeko eskaerak ez aurkeztutzat joko dira, harik eta eskaera erabat zuzendu arte.

21/2013 Foru Arauaren 17. artikuluan 5. apartatuan ezarritakoaren arabera, ezingo da laguntzarik eskatu Lurralde Orearen eta Lurralde Antolamenduaren Sailak kudeatzen dituen beste laguntza programa batzuen 2025eko deialdietan eskatu diren obretarako.

#### 6. Obren tipologia.

Dirulaguntzak jaso ditzakete 21/2013 Foru Arauaren 17. artikuluan jasota dauden jarduketa motek.

Baldin eta 17. artikulua horrek aipatzen dituen jarduketak gauzatzeko erakunde eskudunen baimena edota aldeko txostena behar bada, jarduketari ekin baino lehen eduki beharko da.

Baldin eta eskatutako jarduketa bideetan egin beharrekoa bada, mantentze edo garbiketa jarduketak hartuko dira aintzat, eta salbuespen gisa zoladurak (hormigoizkoak edo akabera asfaltikozkoak), inguruabar fisikoek hala aholkatzen badute (adibidez, malda nabarmenetan), aurkeztutako dokumentazio teknikoan horrela definitzen badira eta, Arabako Foru Aldundiaren Bideen Erregistroan sartutako bideen kasuan, Nekazaritza Garapenerako Zerbitzuak berariaz aholkatzen badu hurrengo paragrafoan aipatzen den txostenean.

Nolanahi ere, eskatutako jarduketa baldin bada obrak Arabako Foru Aldundiaren Bideen Erregistroan sartutako bideetan egiteko, Nekazaritza Saileko Nekazaritza Garapenerako Zerbitzuak aurrekontua edo txosten teknikoa egingo du prozeduraren instrukzio txostena eman aurretik.

Legez definitutako zona arkeologikoetan jardunez gero (kategoria edozein dela ere), nahitaezkoa da Arabako Foru Aldundiko Museo eta Arkeologia Zerbitzuaren txostena edukitzea.

21/2013 Foru Arauaren 17. artikulua 2. apartatuan ezarritakoaren ondorioetarako, laguntza eskatzen duen toki erakundea ondasunen eta eskubideen titulartzat joko da, soilik baldin eta ondasun edo eskubide horiek haren izenean badaude inskribatuta jabetza erregistroan edo, bestela, toki erakundearen ondasunen inbentarioan haren jabetzakoak direla jasota badago.

7. Esleipen araubidea eta hautaketa irizpideak.

Dirulaguntzak esleitzeko araubidea eta aplikatzekoak diren hautaketa irizpideak ekainaren 27ko 21/2013 Foru Arauaren 20. artikuluan daude jasota.

Laguntzen deialdia ebatzi ahal izateko dirulaguntzaren hasierako kalkulua egiteko, aurkezteko epean aurkeztutako aurrekontu ekonomikoa hartuko da kontuan, eta zuzendu egin beharko da, baldin eta alderik edo akatsik antzeman bada. Zuzenketa egin ondoren, emaitza ondorio guztietarako aplikatuko da.

8. Prozeduraren ebazpena eta jakinarazpena.

Prozeduraren ebazpena eta jakinarazpena 21/2013 Foru Arauaren 21. artikuluan xedatutakoaren arabera egingo dira.

Indarrean dagoen legeriaren arabera jakinaraziko zaie toki erakundeei eskatutako obrak programan sartzeari edo ez sartzeari buruzko ebazpena. Ebazpen horrek administrazio bidea amaitzen du.

Laguntzak emateko ebazpenaren jakinarazpenean ezarritako baldintzak eta betekizunak bete beharko ditu toki erakunde onuradunak.

Sektore Publikoko Kontratuei buruzko 9/2017 Legean ezarritakoaren araberrako kontratu txikia bada, kontratazioa egin aurretik gutxienez hiru eskaintza eskatu beharko zaizkie hornitzaile desberdinei, salbu eta ezaugarri bereziak direla-eta merkatuan ez badago eskaintza horiek egiteko behar adina hornitzaile; hori hala bada, erakunde eskatzaileak behar bezala justifikatu beharko du sinatutako dokumentu batean.

Bat etorri Euskararen Erabilera Normalizatzeko azaroaren 24ko 10/1982 Oinarrizko Legeak ezarritakoarekin, obren adjudikaziodunak hizkuntza ofizial bien tratamendu eta erabilera egokiak bermatu beharko ditu, organo eskudunak uste badu kontratuaren xedeak hala eskatzen duela.

9. Gauzatzeko eta dokumentazioa aurkezteko epea.

Deialdi honen babesean diruz lagundutako obrak gauzatzeko jarri den muga eguna 2025eko azaroaren 30a da. Epe horretarako aurkeztu beharko da, halaber, dirulaguntza ordaintzeko aurkeztu beharreko dokumentazioa.

Salbuespen gisa, 2025eko abenduaren 31ra arte luzatu ahal izango da obra amaitzeko eta obra egin dela justifikatzeko dokumentazioa aurkezteko epea, hartarako ahalmena duen Lurralde Oreka eta Lurralde Antolamenduaren Saileko titularrak berariaz onetsi beharko duen justifikazioa aurkeztu ondoren. Epe hori ezingo da inolaz ere egun hori baino geroagora luzatu.

Ordainketa egiaztatzeko dokumentazioa aurkezteko epea 2 hilabetekoa izango da, dirulaguntza ordaintzen den egunetik aurrera.

Diruz lagundutako jardueraren zabalkundea eta publizitatea, euskarria edozein dela ere (liburuxkak, kartelak, argitalpenak...), bi hizkuntza ofizialetan egin beharko da.

10. Dirulaguntzen aldiberekotasuna.

Obra txikiak gauzatzeko laguntzen programaren kontura diruz lagundutako jarduketa bat finantzatzeko dirulaguntza bat baino gehiago jasoz gero aldi berean, 21/2013 Foru Arauaren 24. artikuluan horri buruz xedatutakoari jarraituko zaio.

#### 11. Dirulaguntzak errebokatzea eta itzultzea.

Dirulaguntza emateko eta benetan jasotzeko ezarritako baldintza guztiak funtsezkoak dira, eta, beraz, baldintza horiek betetzen ez badira, dirulaguntza errebokatu egin ahalko da, jasotako zenbatekoak itzuli beharko dira eta, hala badagokio, dirulaguntzak arautzen dituen foru araudian jasotako erantzukizunak izango dira.

Laugarrena. Ahalmena ematea Lurralde Orekaren eta Lurralde Antolamenduaren Saileko diputatuari artatutako obrak izapidetzeko eta gauzatzeko behar diren egintza eta xedapen guztiak eman ditzan, bai eta kasuan kasuko aurrekontu partidetan erabilgarri egotetik eratorritako geroko esleipenak onets ditzan ere, prozedura ebazteko eta errebokatzeko eta/edo gerta daitezkeen itzulketa eskaerak egiteko kide anitzeko organoak egindako proposamenaren lehentasun ordena errespetatuz.

Bosgarrena. Erabaki hau ALHAOn argitaratzea.

Seigarrena. Erabaki hau behin betikoa da administrazio bidean eta bere aurka administrazioarekiko auzi errekurtsioa aurkeztu ahal izango da zuzenean Vitoria-Gasteizko Administrazioarekiko Auzietarako Epaitegian, bi hilabeteko epean, ALHAOn argitaratu ondorengo egunetik aurrera. Hori guztia, bat etorritz Administrazioarekiko Auzietarako Jurisdikzioa arautzen duen uztailaren 13ko 29/1998 Legeak 46. artikuluan xedatutakoarekin.

Vitoria-Gasteiz, 2024ko ekainaren 4a

*Diputatu nagusia*

**RAMIRO GONZÁLEZ VICENTE**

*Lurralde Orekaren eta Lurralde Antolamenduaren Saileko foru diputatua*

**ANARTZ GORROTXATEGI ELORRIAGA**

*Lurralde Orekaren zuzendaria*

**LAURA PÉREZ BORINAGA**